

## الأغنية

قيراط حظ ولا فدان شطارة  
يصبح المائل صاحب عمارة  
ويرقد علي سرير بدل الشيكارة  
ويولع سيجار بدل السيجارة  
ويركب ملاكي ويلبس بدلة كاكي

ويربي النعام وفراخ تكاكي  
ويركب خيول ويدبح عجول  
وينسي الطعمية وفورجيت يا فول  
ولما يعدي الكل يهدّي  
يوسعوا للبيه ابن الأصول  
ويجروا عليه ويبوسوا إيديه  
ودا كُله ليه عشان الجنية

قيراط حظ ولا فدان شطارة  
يصبح المايل صاحب عمارة  
يدخل البرلمان ويعيش في آمان  
ويصاحب فلان وابن فلان  
ولو راح مكان الكل يقوم  
يوسع للبيه كبير القوم

قيراط حظ ولا فدان شطارة  
يصبح المايل صاحب عمارة

آه يازمن النفاق آه يازمن مهووس  
لو مفيش فلوس الكل عليّه يدوس  
ولو معايه فلوس الكل لإيدي يبوس  
ولو ادخل مكان يقف الجلوس  
قيراط حظ ولا فدان شطارة  
يصبح المايل صاحب عمارة

\*\*\*\*\*